

欽  
定  
全  
唐  
文

欽定全唐文卷九十八目錄

高宗武皇后

四

賜新除都督刺史繡袍回文銘

賜三品以下官繡袍回文銘

豫州鼎銘

昇仙太子碑

并序

大福先寺浮圖碑

元宗江妃

樓東賦

宋尚宮

牛應貞傳

順宗王皇后

遺令

憲宗郭皇后

命江王即位冊文

昭宗何皇后

命皇太子即位令

命皇太子即位冊文

欽定全唐文卷九十八

高宗武皇后

四

賜新除都督刺史繡袍回文銘

德政惟明職令思平清慎忠勤榮進躬親

賜三品以下官繡袍回文銘

忠貞正直崇慶榮職文昌翊政勲彰慶陟懿冲順彰義忠  
慎光廉正躬奉謙感忠勇

豫州鼎銘

羲農首出軒昊膺期唐虞繼踵湯禹乘時天下光宅域內

金定台曆卷之九  
雍熙上元降祉方建隆基

昇仙太子碑 并序

朕聞天地權輿混元黃於元氣陰陽草昧徵造化於洪鑪  
萬品於是資生三才以之肇建然則春榮秋落四時變寒  
暑之機玉兔金烏兩曜遞行藏之運是知乾坤至大不能  
無傾歟之形日月至明不能免盈虧之數豈若混成爲質  
先二儀以開元兆道標名母萬物而爲稱惟恍惟惚窈冥  
超言象之端無去無來寥廓出寰區之外驂鸞馭鳳昇八  
景而戲仙庭駕月乘雲驅百靈而朝上帝元都迴關玉京

爲不死之鄉紫府旁開金闕乃長生之地吸朝霞而飲甘露控白鹿而化青龍魚腹神符已效徵於涓子管中靈藥方演術於封君從壺公而見玉堂召盧敖而赴元闕炎皇少女剩往仙家負局先生來過吳市或排煙而長往或御風而不旋旣化飯以成蜂亦變枯而生葉費長房之縮地目覽遐荒趙簡子之賓天親聆廣樂懷中設饌標許彥之奇方座上釣魚呈左慈之妙技遙昇閣道遠睇平衢鼓琴瑟而駕輜輶出西開而遊北海登崑崙而一息期汗漫於九垓湘東遺鳥跡之書濟北致魚山之會拂虹旌於日路

飛羽蓋於煙郊旣入無窮之門遂游無極之野青虬吐甲  
爰披五岳之文丹鳳銜符式受三皇之訣瀨鄉九井漾德  
水而澄漪淮南八仙著真圖而闡秘自非天姿拔俗靈骨  
超凡豈能訪金籙於元門尋玉皇於碧落者矣昇仙太子  
者字子喬周靈王之太子也原夫補天益地之崇基三分  
有二之洪業神宗啟胄先承履帝之祥聖考興源幼表靈  
顙之相白魚標於瑞典赤雀降於禎符屈叔譽於三窮錫  
師曠以四馬穀洛之關嚴父申欲壅之規而匡救之誠仙  
儲切犯顏之諫播臣子之懿範顯圖史之芳聲而靈應難

窺冥徵罕測紫雲爲蓋見嘉貺於張陵白蜺成質遺神丹  
於崔子鳳笙流響恒居伊洛之間鶴駕騰鏤俄陟神仙之  
路嵩高嶺上雖藉浮邱之迎緱氏峯前終待桓良之告傍  
稽素篆仰叩元經時將玉帝之游乍洽琳宮之宴仙冠岌  
岌表嘉稱於芙蓉右弼巍巍效靈官於桐柏九丹可挹仍  
標延壽之誠千載方傳尚紀仙人之祀辭青宮而歸九府  
棄蒼震而慕重元無勞羽翼之功坐致雲霄之賞雖黃庭  
衆聖未接於末塵紫洞羣靈豈驂於後乘斯乃騰芳萬古  
擅美千齡豈與夫松子陶公同年而語者也我國家先天



纂業闢地裁基正八柱於乾綱紐四維於坤載山鳴鸞鶩  
爰彰受命之祥洛出圖書式兆興王之運廓提封於百億  
聲教洽於無垠被正朔於三千文軌同於有截茫茫宇宙  
掩沙界以䟽壇眇眇寰區籠鐵圍而劃境坐明堂以崇嚴  
祀大禮攸陳謁清廟而展因心洪規更闡文山西峙上聳  
於圓清武井東流下凝於方濁駢柯連理恒騁異於彤墀  
九穗兩岐每呈祥於翠畝神芝吐秀宛成輪蓋之形厯草  
抽英還司朔望之候山車澤馬充仞於郊畿瑞表祥圖洋  
溢於中外乾坤交泰陰陽和而風雨調遠肅邇安兵戈戢

而燿烽靜西鷄東鰈已告太平之符鄩黍江茅屢薦昇中  
之應而王公卿士百辟羣僚咸詣闕以披陳請登封而告  
禪敬陳嚴配之典用展禋宗之儀泥金而叶於告成瘞玉  
而騰於茂實千齡盛禮一旦咸申爾乃鳳輦排虛旣造雲  
霞之路龍旗拂迴方馳日月之扃後殿縈山先鋒蔽野千  
乘萬騎鉤陳指靈岳之前谷窾川停羽駕陟仙壇之所旣  
而馳情煙路係想元門遙臨松寢之前近瞰桂巖之下重  
巒絕磴空留落景之暉複廟連甍徒見浮雲之影山扉半  
毀纔覩昔年之規礪牖全傾更創今辰之製乃爲子晉重

立廟焉仍改號爲昇仙太子之廟方依福地肇啟仙居開  
廟後之新基獲藏中之古劒昆吾挺質巨闕標名白虹將  
紫電爭鋒飛景共流星競彩去夜驚而除衆毒輕百戶而  
却三軍空勞望氣之人自遇象天之寶巖巖石室紀黃老  
五千之文赫赫靈壇披碧洞三元之錄爰於去歲嘗遣內  
史往祠雖人祇有路隔之言而冥契著潛通之兆遂於此  
日頻感殊禎迢遞雲間聞鳳笙之度響徘徊空裏瞻鶴駕  
之來儀瑞氣氤氲異香芬馥欽承景貺目擊休徵爾其近  
對緱岑遙臨嵩嶺變維城之往廟建儲后之今祠窮工匠

之奇精傍臨絕壑建山川之體勢上冠雲霓其地則測景  
名都交風勝壤仰觀元緯星文當太室之邦俯矚黃輿地  
理處均霜之境膏腴宇宙通百越之樓船穴險山原控八  
方之車騎危峯切漢德水橫川實天下之樞機極域中之  
壯觀於是捫危鑿陟越壑裁基命般爾而開筵召公輸而  
綴思梅梁瞰迴近架煙霞桂棟臨虛上連日月窻明雲母  
將曙景而同暉戶挂琉璃共晴天而合色曲閣乘九霄之  
表重檐架八景之中湛休水於天池發祥花於奇樹珠闕  
據緱峯之外瑤壇接嵩嶠之隈素女乘雲窺步檐而不逮

青童駕羽仰層檻而何階茂躅鬱兮若生靈儀蕭兮如在  
昔峴山墮淚猶見鉅平之碑襄水沈波尚有當陽之碣況  
乎上賓天帝搖山之風樂不歸下接浮邱洛浦之笙歌斯  
遠豈可使芳猷懿躅與歲月而推遷霞宇星壇共風煙而  
歇滅迺刊碑勒頌用紀徽音庶億載而惟新齊兩儀而配  
久方佇乘龍使者爲降還齡之符駕羽仙人曲垂駐壽之  
藥使璇璣叶度玉燭調時百穀喜於豐年兆庶安於泰俗  
虔敷短製乃作銘云

邈矣元始悠哉渾成傍該萬類仰契三精至神不測大象

難名出入太素驅馳上清

其一

黃庭仙室丹闕靈臺銀宮雪

合玉樹花開夕游雲路朝挹霞杯霓旌髴羽駕徘徊

其二

樹基創業遷朝立市四險天中三川地紀白魚呈貺丹鳥

薦祉靈骨仙才芳猷不已

其三

遐瞻帝系仰睠仙儲遙馳月

域高步煙墟名超紫府職邁玉虛飄飄芝蓋容與雲車

其四

遠集崑崙遙期汗漫金漿玉液霧官霞館瑤草扶疎珠林

璀璨萬劫非久二儀何算

其五

栖心大道託迹長生三山可

陟九轉方成鳧飛鳥影鳳引歌聲永昇金闕恒遊玉京

其六

青童素女浮邱赤松位稱桐柏冠號芙蓉尋真御辯控鶴

乘龍高排雲霧輕舉遐蹤

其七

歲往年移天長地久霄漢爲

室煙霞作友舞鶴飛蓋歌鸞送酒絕迹氛埃芳名不朽

其八

粵我大周上膺元命補天立極重光累聖嘉瑞屢臻殊祥

疊映歸功蒼昊昇中表慶

其九

爰因展禮途接靈居年載超

忽庭宇凋疎更安珠敦重開玉虛方依翠壁敬勒丹書

其十

新基建趾古劒騰文鳳笙飛韻鶴駕凌雲休符雜沓嘉瑞

氤氲仙儀靡見逸響空聞

其十一

仰聖思元求真懷昔霞軒

月殿星宮霧驛萬歲須臾千齡朝夕紀盛德於芳翰勒鴻

名於貞石

其十二

大福先寺浮圖碑

朕聞圓蓋上騰元氣創乾坤之始方輿下闢太極分造化之初象帝膺期彈壓陰陽之表風皇馭歷牢籠宇宙之先然而迹昧洪荒聲沈朴略豈如法王法力迴超生滅之區勝躅勝緣高拔去來之境淨身圓對赴機感而現金容覺智虛融隨慧應而流寶句普霑法雨等蔭慈雲引六趣而託神居招四生而登梵域即色非色湛實相而載山河因空示空就法性而懸日月道分四攝廣開遷拔之源理極一乘潛申究竟之路禪波湛鏡登彼岸而出四流慧日昇



輪光九天而燭三界含識戴能仁之力懷生仰調御之功  
諸相皆無神獨超於解脫即心爲有道深會於慈悲誘悟  
羣迷昭宣景福故乘因喻筏證果中天汲引被於含生濟  
度該於庶品無來不應有感斯通轉十二之法輪除億兆  
之疑網爲出塵之妙域乃化俗之良因大庇含靈其惟正  
覺者矣伏惟皇考太祖無上孝明高皇帝負日標靈膺雲  
誕秀神凝繫表思韞機初瑞叶珠衡祥開玉斗允文允武  
名光百代之前乃聖乃神功冠千齡之表仁覃覆載總天  
地之無私化洽財成貫陰陽之不測皇妣無上孝明高皇

后習禮凝規依仁成性柔輝允穆播蘭畹之清芬媛範惟  
新激林飈之逸韻玉雞貽貺沙麓降祥邁附寶以居尊軼  
女登而表德功高十亂視天之業彌隆化漸六宮偃月之  
符載遠然以孝誠無感夙遘閔凶怙恃之蔭俱傾攀號之  
志恒切銅渾變序鎮增荼蓼之悲銀箭移年伏深松檟之  
暮露草有長摧之感風枝無再靜之期思奠謁而增悽想  
靈筵而倍咽白雲馳戀蒼野凝哀上仙之歲方遙攀聖之  
哀轉積然則金谷湛寂常住之體逾隆寶相騰輝善逝之  
因彌洽式駐輪迴之境係想青蓮佇開方便之門運心丹

枕故知報慈恩於畢地善權之願斯宏竭孝享於終天波  
若之資攸重所以虔心勝祐肅奉明因迺建香城虔興淨  
域大福先寺者先聖之舊居也爾其途臨測景地處交風  
樓臺鬱而煙霧深山川曠而原野淨前瞻太室控紫岳之  
三花却鏡伊瀍帶黃河之千里龍門右闢通梵宇之清輝  
龜浦橫流激禪池之逸派途開八政門閤九達萬國交會  
之區四海朝宗之所崇軒四敞邃宇千重複道周流危階  
邐迤霜鐘月磬聲參洛浦之笙玉女仙人影接緱山之鶴  
東西日月行藏靈鷲之峯朝夕煙霞隱映猴池之水地積

吉祥之草鹿苑含芳庭敷覺意之花雞林絢色清風振響  
韻諧天樂之音弄鳥和鳴聲雜魚山之梵雕宮曉闢綺殿  
宵開疑觀帝釋之居似覲燈王之座珠樓曜景苑如兜率  
之天寶樹吟風事符安養之國虹梁天矯上出漢而疑懸  
虬棟參差下臨空而畏落曾軒峻宇猶昔日之餘基珠閣  
銀宮諒今辰之新葺桂吐連拳之影氣蘊秋窻蓮舒菡萏  
之輝香浮夏沼雲纓霧縠與道樹而交陰寶蓋珠幡共流  
霞而合色柰園敷藥香雜天花竹苑來風聲喧地籟危樓  
複道之峻何必醍醐之山福地聖泉之流豈獨僧伽之水

雕甍錯落似布龍鱗繡宇峇巖如培羊角飛檐畫拱迴騰  
雲閣之前藻井披蓮高出星河之上璇題切漢陰兔以之  
停輪寶刹干霄陽鳥爲之迴翼珠髻力士金色善神依寶  
界以資祥對仙庭而護法鑪積六銖之氣幡搖五色之虹  
讚梵之響風傳雕飾之資霧積所謂嚴持淨域建立招提  
非百常之可奇何九層之能擬竹陰藏日蘊虛白而生寒  
松氣含煙鬱青霞而似暝臨三休之窈窕對雙闕之崢嶸  
窮壯觀於周原極雕鐫於郢匠討論形勝眺覽盡於無邊  
推出因緣利涉該於有截爾乃崇梵宇選名僧或杖錫而

來臻或乘杯而戾止莫不情塵久謝性月恒明遠蹈四禪  
迴超三界談高象外激揚金口之詞思逸幽元敷讚琅函  
之典雖復戴馮重席比雅論而多慚惠子聯環擬清談而  
有愧十地盡禪門之侶四天爲法會之賓肅肅焉惶惶焉  
誠紺宇之棟梁實緇徒之領袖者也故能使天龍恭敬道  
俗歸依息火宅而清炎洗塵勞而滌想宏大慈而廣濟爲  
曠劫之洪津方標六度之功實啟一乘之路所以憑善權  
之妙業廣元聖之隆基仰竭深衷敬申宏願聿懷多福式  
建浮圖恭記勝緣敬資先佑爰初制造逮至畢功嘉貺駢

金定合卷五  
闌休符雜沓靈禽告曙匠者候以興功仙鶴呈姿僧徒仰  
而咸躍或瑞雲騰彩遶蓮塔以成文或祥龍見奇俯花臺  
而曜影寶梯攝迴平臨善視之天香蓋排空高出多羅之  
樹毗婆山上七葉敷石室之中無量佛前百花散菩提之  
下真人羅漢超化閣以遊神菩薩聲聞入仙宮而締賞文  
殊師利疑問疾於淨名薩陀波崙似請經於無竭十六丈  
屋豈惟須達之功千二百房詎假祇陀之勢雖復寶塔踊  
出無以匹此精奇花臺傑起不足擬其神妙千變萬化六  
彩五彰隱隱冠於虹蜺迢迢入於雲漢珠交夕映綴星月

之仙輝寶鐸晨吟韻宮商之逸響于闐香像盡寫龍龕舍  
利全身咸昇鴈塔經綸畢備制度咸修旣欣冥力之資理  
藉神功之助巍如地踊邈若天開齊壯觀於鐵圍得規模  
於梓匠靈機不測發揮宇宙之精神道無方盤薄陰陽之  
氣當願莊嚴聖辰奉翊尊容七淨澄神三明啟慮登花臺  
而縱賞俯茱座而宣關天駕辯星皇之表財成十地凝圖  
日帝之先關宗廟逾隆與金山而等峻寰區益廣並沙劫  
而常寧景運休明乾坤交泰龍駕與高穹共遠鳳歷將關  
九瀛塵清四表元良則道光貳極識朗重明孝關



元宗江妃

妃名采蘋莆田人開元初高力士選入侍元宗甚見寵幸  
所居悉植梅花帝因其好名爲梅妃

樓東賦

玉鑑塵生鳳奩香殄懶蟬髮之巧梳閑縷衣之輕練苦寂  
寞於蕙宮但凝思乎蘭殿信飄落之梅花隔長門而不見  
況乃花心颺恨柳眼弄愁暖風習習春鳥啾啾樓上黃昏  
兮聽鳳吹而回首碧雲日暮兮對素月而凝眸溫泉不到  
憶拾翠之舊遊長門深閉嗟青鸞之信修憶昔太液清波

水光蕩浮笙歌燕賞陪從宸旒奏舞鸞之妙曲乘畫鷁之  
仙舟君情繾綣深敘綢繆誓山海而長在似日月而無休  
柰何嫉色庸庸妬氣沖沖奪我之愛幸斥我於幽宮思舊  
歡之莫得夢想著乎朦朧度花朝與月夕若懶對乎春風  
欲相如之奏賦柰代才之不工屬愁吟之未盡已響動乎  
疎鐘空長嘆而掩袂躊躇步於樓東

宋尚宮

尚宮名若昭貝州清陽人警慧善屬文德宗召入禁中試  
文章并問經史大義呼爲學士穆宗立拜尚宮厯憲穆敬

三朝皆呼爲先生寶厯初卒贈梁國夫人

牛應貞傳

牛肅長女曰應貞適宏農楊唐源少而聰穎經耳必誦年十三凡誦佛經二百餘卷儒書子史又數百餘卷親族驚異之初應貞未讀左傳方擬授之而夜初眠中忽誦春秋起惠公元妃孟子卒終智伯貪而愎故韓魏反而喪之凡三十卷一字無遺天曉而畢當誦時有教之者或相酬和其父驚駭數呼之都不答誦已而覺問何故亦不知試令開卷則已精熟矣著文章百餘首後遂學窮三教博涉多

能每夜中眠熟與文人談論文人皆古之知名者往來答  
難或稱王弼鄭元王衍陸機辯論鋒起或論文章談名理  
往往數夜不已年二十四而卒今採其文魍魎問影賦著  
於篇其序曰庚辰歲予嬰沈痛之疾不起者十旬毀頓精  
神羸瘁形體藥物救療有加無瘳感莊子有魍魎責影之  
義故假之爲賦庶解疾焉魍魎問於予影曰君英達之人  
聰明之子學包六藝文兼百氏頤道家之祕言探釋部之  
幽旨旣虔恭於中饋又希慕於前史不矯枉以干名不毀  
物而成己伊淑德之如此即精神之足恃何故羸厥姿貌

沮其精神煩寃枕席憔悴衣巾子惟形兮是寄形與子兮  
相親何不誨之以崇德而教之以自倫異萊妻之樂道殊  
鴻婦之安貧豈痼疾而無生賴將微賤而欲忘身今節變  
歲移臘終春首照晴光於郊甸動暄氣於梅柳水解凍而  
繞軒風扇和而入牖固可蠲憂釋疾怡神養壽何默爾無  
營自貽伊咎僕於是勃然而應曰子居於無人之域遊乎  
魍魅之鄉形旣圖於夏鼎名又著於蒙莊何所見之不博  
何所談之不長夫影依日而生像因人而見豈言談之足  
曉何節物之能辨隨晦明以興滅逐形體以遷變以愚夫

畏影而蒙鄙之性以彰智者視陰而遲暮之心可見伊美  
惡兮由己影何辜而遇譴且予聞至道之精窈兮冥至道  
之極昏兮默達人委性命之修短君子任時運之通塞悔  
吝不能纏榮耀不能惑喪之不以爲喪得之不以爲得君  
子何乃怒予之不賞芳春責予之不貴華飾且吾之秉操  
奚子智之能測言未卒颺颺惕然而驚歎而起曰僕生於  
絕域之外長於荒遐之境未曉智者之處身是以造君而  
問影旣談元之至妙請終身以藏屏初應貞夢製書而食  
之每夢食數十卷則文體一變如是非一遂工爲賦頌文

名曰遺芳也

順宗王皇后

后瑯邪人祖難得封郡公父顏衛尉卿代宗時以良家選入宮爲才人順宗在藩帝以才人幼故賜爲王孺人是生憲宗順宗即位將立后会病棘而止憲宗內禪尊爲太上皇后元和元年上尊號曰皇太后崩年五十四諡莊憲

遺令

皇太后敬問具位萬物之理必歸於有極未亡人嬰霜露疾日以衰頓幸終天年得奉陵寢志願獲矣其何所哀易

月之典古今所共皇帝宜三日聽政服二十七日釋天下吏民令到臨三日止宮中非朝暮臨無輒哭無禁婚嫁祠祀飲酒食肉已釋服聽舉樂侍醫無加罪陪紆如舊例

憲宗郭皇后

后爲贈左僕射駙馬都尉暖之女憲宗爲廣陵王時納爲妃元和元年八月冊爲貴妃穆宗即位冊爲皇太后敬宗即位尊爲太皇太后諡懿安

命江王即位冊文

維寶曆二年歲次景午十二月甲午朔十二日乙巳太皇



太后若曰大行皇帝睿哲英能對天明命方夏底績夷蠻貢庭罔有不端大康有截宜荷九廟之靈永享億年之祿豈虞奸妖竊發矯專神器蠱惑中外扇誘羣朋駭動神人釁深梟獍咨爾江王昂聰姿孕粹清明毓和智算機關元謀電發躬率義勇大靖凶徒且膺當璧之符爰攄枕戈之憤旣殲巨害當享豐福是用命爾陟於元后宜令司空平章事裴度奉冊即皇帝位永惟高祖太宗之翦定隋亂元宗之浸漬利澤憲宗之堅除蠹孽艱難險阻曷乃負荷小心以事上帝儉德以刑邦家懋於令聞持久如始敬之休

哉

昭宗何皇后

后梓州人族系不顯昭宗即位封淑妃從狩華州詔冊爲  
皇后哀帝即位尊爲皇太后徙居積善宮號積善太后爲  
朱全忠所弑

命皇太子即位令

予遭家不造急變爰臻禍生女職之徒事起宮奚之輩皇  
帝自罹鋒刃已至彌留不及顧遺號慟徒切定大計者安  
社稷纂丕圖者擇賢明議屬未亡人須示建長策承高祖

之寶運繫元勲之忠規仗爾股肱以匡沖昧皇太子祝宜  
於樞前即皇帝位其哀制並依祖宗故事中書門下準前  
處分於戲送往事居古人令範行今報舊前哲格言收淚  
敷宣言不能喻

命皇太子即位冊文

維天祐元年歲次甲子八月壬辰朔十五日景午皇后若  
曰高祖太宗撥亂返正奄有天下垂三百年重熙累聖莫  
不功光祖業克紹丕圖予遭家不造變起宮闕雖號慟期  
至於終天而負荷實先於立嗣咨爾皇太子監國事天資

岐嶷神授英明孝比東平之蒼學富陳留之植恭謙守政  
和順稱仁友愛聞於弟兄令譽播於區宇比則隆元帥深  
暢戎機今乃位儲宮益歸羣望是用爰循舊典上纂鴻基  
既允集於天人當欽承於宗社宜即皇帝位於戲萬幾不  
可以久曠四海不可以乏君膺紹寶圖光踐皇祚節儉以  
勵戎夏文德以戢干戈無怠無荒克慈克悌永保厥躬用  
揚祖宗之不緝休命可不敬哉

欽定全唐文卷九十九目錄

隴西王博義

服制議

荆王元景

請封禪表

恒山王承乾

答元琬法師書

濮王泰

請釋法恭爲戒師書

蔣王暉

五色卿雲賦

皇太子宏

諫逃軍配沒家口疏

請樹孔子廟碑疏

章懷太子賢

西明寺鐘銘

譙王重福

在均州自陳表

襄王重茂

誅韋氏制

大赦詔

讓位詔

答相王讓位詔

寧王憲

讓兼領太常卿表

邠王守禮

賀駟雉見齋宮表

欽定全唐文卷九十九

隴西王博乂

博乂高祖兄蜀王湛子武德元年封隴西王高宗時歷宗正卿禮部尚書加特進咸亨二年薨贈開府儀同三司荊州都督諡曰恭

服制議

緬尋喪服母名斯定嫡繼慈養皆在其中惟出母之制特言出妻之子明非生已則皆無服是以令著母嫁之夫又云出妻之子出言其子以著所生嫁則言母通包養嫡俱



當解任並合心喪其不解者惟有繼母之嫁繼母爲名正據前妻之子嫡於諸孽禮無繼母之文甲令今旣見行嗣業理申心制然奉勅議定方垂永則今有不安亦須釐正竊以嫡繼慈養皆非所生出之與嫁並同行路嫁雖比出稍輕於父終爲義絕繼母之嫁旣殊親母慈嫡義絕豈合心喪望請凡非所生父卒而嫁爲父後者無服非承重者杖朞並不心喪一同繼母有符情禮無玷舊章又心喪之制惟施厭降杖朞之服不悉解官而令文三年齊斬亦入心喪之例杖朞解官又有妻喪之外又依禮庶子爲其母

總麻三月既是所生母服準例亦合解官令文漏而不言  
於事終須修附既與嫡母等嫁同一條總議請改理爲允  
愜

荆王元景

元景高祖第六子武德三年封趙王八年授安州都督貞  
觀初歷雍州牧右驍衛大將軍十年徙封荆授荊州都督  
轉鄜州刺史永徽初進位司徒坐與房遺愛謀反賜死國  
除後追封沉黎王神龍初追復爵土

請封禪表

夫功成道合古今以爲隆平登封降禪聖賢謂之大典是以出震則天之后革夏變商之君繼韶夏而施尊名崇號謚而廣符瑞顧遲遲焉羣臣區區誠爲此也原夫大始云構生靈厥萌黎庶布乎穹壤皇王司其右契遐哉上古以迄於茲歷選休徵未有如今日之盛也所以敢罄窺管無懼觸鱗瀝膽披肝言亦備矣援天引聖辭亦殫矣幸蒙亭育之澤降以聽覽之恩大賚雖敷猶申後命未便渙汗方事竣巡懷生之徒不遑寧處伏乞皇帝陛下則天成務應物爲心協三才之會昌乃沛然而動色遂萬姓之延首俯

凝旒而改容雖復龍圖告徵龜書襲吉尚諮諏於四嶽建  
明謨於兆人欲使六合之中沃心通於朝野八紘之內下  
問浹於華戎凡在人靈疇無扑躍今茲百辟咸集九有攸  
同並執玉以來庭俱式歌而且舞遠則重譯僉議近則端  
笏參謀欣覩增天之高願逢加地之厚絕域忘生而越險  
華髮忍死而爭趨中外之心克諧愚智之情允睦掌故事  
者草登封而待期執羈勒者儼車徒而俟命庶官率職三  
事夙興遠邇昌言明靈幽贊莫不傾視俯聽希陪肆覲之  
禮效祉呈祥欽承告成之慶山稱萬歲企和鑾而發奇雲

浮五彩佇華蓋而交蔭兩儀之情轉迫萬國之望愈深臣  
又聞之屈已從衆至人所以稱仁絲言顯發哲王所以敷  
信昨奉明詔許以試之實降皇情俯同人欲寬人之利斯  
博示信之道宜宏即日庶尹馳心咸奉章而守闕列藩翹  
足各伏地以祈恩所冀天慈深加昭察制可羣僚之奏剋  
以發軫之期頒示普天申明絕典使夫一時之士欣獨高  
於萬代八荒之酋荷周露於再造則臣等死日猶生之年  
不任誠懇之至謹與連率方牧等奉表詣闕固請以聞

恒山王承乾

承乾字高明太宗長子武德三年封恒山王七年徙封中山太宗即位爲皇太子甫八歲特敏惠太宗使裁決庶政有大體每行幸令監國及長好聲色慢遊過惡寢聞時魏王泰有美名謀奪嫡而承乾病足不良行懼廢與泰交惡陰召左衛副率封師進及刺客張師政紇干承基謀殺泰不克遂與漢王元昌及侯君集等啗臂血盟謀以兵入西宮貞觀十七年齊王祐反事連承基繫獄當死因上變治之事皆明驗廢爲庶人徙黔州十九年死開元中贈還爵土

答元琬法師書

辱師所示妙法四科循覽周環用深銘佩法師早祛塵累  
遊神物表闡驚嶺之微言探龍宮之祕藏洞開靈府凝照  
元門固以高步彌天隣幾初地遂能留情博施開導蒙心  
理實義周詞華致遠包括今古網羅內外訓誘之至審諭  
之方縱聖達立言師傳宏道亦未足髣髴要津擬議高論  
但行慈滅殺順氣奉齋斯乃仁人之心以成大慈之行謹  
當緘諸心府奉以周旋永藉勝因用期冥祐

濮王泰

泰字惠襄太宗第四子武德三年封宜都王四年進封衛  
繼懷王霸後貞觀二年改封越授揚州大都督再遷雍州  
牧左武侯大將軍轉鄜州大都督十年徙封魏遙領相州  
都督時太子承乾病蹇泰潛圖奪嫡承乾懼陰使人上書  
言泰罪狀旣而承乾敗太宗詢知其繇詔廢之幽泰將作  
監尋改王順陽徙居均州之鄖鄉縣二十一年進封濮高  
宗立爲泰開府置僚屬永徽三年薨年三十五贈太尉雍  
州牧諡曰恭

請釋法恭爲戒師書



昔道安晦迹襄陽聲馳秦闕慧遠棲心廬岳名振晉京故知善言之應非徒千里明月所照不隔九重法師笠澤上仁震維高德律行淨於青眼威儀整於赤髭傳燈之智不窮法施之財無盡弟子攝此心馬每渴仰於調御墾此身田常戴懷於法雨若得師資有託冀以祛此六塵善導啟行庶無迷於八正謹遣諮祈佇承慈誘

蔣王惲

惲太宗第七子始王鄴徙王蔣拜安州都督永徽三年徙梁州上元中遷箕州刺史錄事參軍張君徹誣以反懼自

殺高宗知其枉贈司空荊州大都督

五色卿雲賦

以題爲韻

惟皇建極兮憲章前古於穆文明兮保乂寰宇御時得一  
兮臨人以五法天無私兮承天之祐至矣哉衆兆融朗山  
川出雲叶千年之休裕垂五色之氤氲蕭索離披狀虹輝  
之貫日徘徊搖曳疑鼎氣之歆汾散作霞彩聚成錦文匪  
騰華於觸石信呈瑞於明君其靜也專其動也直旣無散  
漫亦無消息遠而可視高未能逼乘輕吹之霏微映朝陽  
而翕施稟造化之元氣挺自然之奇色英倏倏也祇可以

金定全居五  
卷之二十一  
理求紛溶溶兮固難乎智測若霧非霧有始有極轉空不  
待於扶搖動日豈資於羽翼有道斯見無德匪呈庶物皆  
覩應天之卿體鵠振而超越候龍吟而化成則需爲大矣  
可謂乎元亨利貞

### 皇太子宏

宏高宗第五子永徽六年封代王顯慶元年立爲皇太子  
咸亨二年高宗幸東都令監國宏仁孝未嘗有過武后將  
騁志宏奏請數拂旨上元二年從幸合璧宮遇酖薨年二  
十四謚曰孝敬皇帝中宗踐祚祔於太廟號義宗開元六

年建廟東都停義宗號以謚名廟

諫逃軍配沒家口疏

竊聞所司以背軍之人身久不出家口皆擬沒官亦有限  
外出首未經斷罪諸州囚禁人數至多或臨時遇病不及  
軍伍緣茲怖懼遂即逃亡或因樵採被賊抄掠或渡海來  
去漂沒滄波或深入賊庭有被傷殺軍法嚴重皆須相儻  
若不給儻及不因戰亡即同隊之人兼合有罪遂有無故  
死失多注爲逃軍旅之中不暇勘當直據隊司通狀將作  
真逃家口今總沒官論情實可哀愍書曰與其殺不辜寧

金匱要略卷之三  
失不經伏願逃亡之家免其配沒

請樹孔子廟碑疏

臣聞周師東邁商閭延降軾之榮漢蹕西旋夷門致抱關  
之想況泣麟曾躅歌鳳遙芬被縉禮於昌辰飾殊榮於窮  
壤者哉伏惟皇帝陛下資靈統極稟粹登樞乃聖乃神體  
陰陽而不宰無爲無事均雨露之莫私六符薦而泰階平  
百寶臻而天祚永靈臺所以偃伯延閣由其增絢尚齒尊  
賢邁鴻名於萬古興亡繼絕騰峻軌於千齡大矣哉茂實  
英聲固無得而稱矣日者封金岱畎會玉梁陰路指沂川

途經闕里回鑾駐罕式鑑堯禹之姿闢續凝旒載想溫良  
之德於是特紆宸渙贈以太師爰命重臣申其奠醑廟堂  
卑陋重遣修營褒聖侯德倫子孫咸蠲賦役臣恩均扈從  
迹濫撫軍舊烈遺塵躬陪瞻眺雩壇相圃欣覲前聞又昔  
歲承恩齒胄膠塾厯觀軒屏具列門徒想仁孝於顏曾彌  
深景慕採風猷於竹帛冀啟顓蒙所以輕敢陳聞庶加褒  
贈天慈下濟無隔異時咸登師保式光泉夜敢以前恩重  
茲干請竊謂宣尼之廟重闡規模桂奠蘭羞永傳終古崇  
班峻禮式賁幽挺而翠玉莫題言猷靡暢詢諸故實有所

未周且將聖自天惟幾應物拯人倫於已墜甄禮樂於旣  
傾祖述勲華三千勵其鑽仰憲章文武億兆遵其藏用豈  
可使汾川遺碣獨擅於無慚峴岫餘文孤標於墮淚伏見  
前件孔廟營構畢功峻業增徽事資刊勒敢希鴻澤令樹  
一碑且遼海清夷久無徵發山東豐稔時踰恒歲況鄒魯  
舊邦儒教所起刊勒之費未足爲多許其子來不日便就  
乞特矜照遂此愚誠臣識昧常規言慚通理塵瀆聽覽追  
增竦戰

章懷太子賢

賢字明允高宗第六子永徽六年封潞王授岐州刺史加  
雍州牧龍朔元年徙封沛累進揚州大都督右衛大將軍  
更名德徙封雍授涼州大都督上元元年復名賢立爲皇  
太子監國時明崇儼以左道爲武后所信密稱英王類太  
宗又言相王相最貴宮人潛議賢乃后姊韓國夫人生賢  
聞之疑懼后數以書讓愈不自安調露中崇儼爲盜所殺  
后疑出賢謀遣人發其陰事詔薛元超等雜治之獲甲首  
數百於東宮乃廢爲庶人遷於巴州武后得政詔左金吾  
將軍邱神勣檢衛賢第迫令自殺年三十二后貶神勣疊



州刺史復爵雍王神龍初贈司徒睿宗立追贈皇太子謚  
曰章懷

西明寺鐘銘

維大唐麟德二年歲躔星紀月次降婁二月癸酉朔八日  
庚辰皇太子奉爲二聖於西明寺造銅鐘一口可一萬斤  
發漢水之奇珍採蜀山之祕寶虞倕練火晉曠飛鑪帶龍  
虞而騰規應鯨桴而寫製聲流九地遐宣厚載之恩韻徹  
三天遠播曾旻之德寤羣生於覺路警庶類於迷塗業擅  
香垣功齊塵劫式旌高躅敢勒貞金頌其銘曰

青祇薦祉黃離降精渦川毓德瑤嶺飛英吹銅表性問寢  
登情興言淨業載啟香城七珍交鑄九乳圖形翔龍若動  
偃獸疑驚制陵周室規踰漢庭風飄旦響霜傳夜鳴仰延  
皇祚俯導蒼生聲騰億劫慶溢千齡

譙王重福

重福中宗第二子初封唐昌王聖厯三年徙封平恩長安  
四年進封譙神龍初韋庶人譖與張易之兄弟陷太子重  
潤貶濮州員外刺史徙合均二州不領事睿宗立徙集州  
未行用張靈均謀潛募勇敢士詐乘驛趨東都欲襲殺留

守劫左右屯營兵爲亂事敗投漕渠死年三十一詔以三品禮葬

在均州自陳表

臣聞功同賞異則勞臣疑罪均刑殊則百姓惑伏惟陛下德侔造化明齊日月恩及飛鳥惠加走獸近者焚柴展禮郊祀上元萬物霑愷悌之仁六合承曠蕩之澤事無輕重咸赦除之蒼生並得赦除赤子偏加擯棄皇天平分之道固若此乎天下之人聞者爲臣流涕況陛下慈念豈不愍臣恓惶伏望捨臣罪愆許臣朝謁儻得一仰雲陛再覩聖

顏雖沒九泉實爲萬足重投荒徼亦所甘心

襄王重茂

重茂中宗第四子聖厯三年封北海王神龍初進封溫王授右衛大將軍兼遙領并州大都督未出閣景龍四年韋庶人臨朝稱制立王爲帝韋氏敗遜位於睿宗景雲二年改封襄王遷於集州開元二年轉房州刺史薨年十七諡曰殤帝

誅韋氏制

天未悔禍王室多難大行皇帝升遐之際事起倉卒朕以

沖藐嗣守丕圖銜恤問故遂窮凶黨逆賊馬秦客等潛通  
宮禁敢行鴆毒而宗楚客紀處訥武延秀趙履溫韋播高  
嵩韋挺葉靜能韋建楊均王哲等遂扇太后干朕家事凡  
有處分政繇韋氏楚客又妄說妖言務欲勸進連結中外  
將危宗社又頃者王慶之李玟張嘉福前麟遊縣令杜無  
二越州長史宋之問潛行表狀請立武承嗣爲皇太子則  
天皇后斬慶之一人之問以附託三思獲免今之問李玟  
又託楚客晉卿與將作少匠李守質日夜潛圖令延秀起  
事朕之微眇危若綴旒安國相王鎮國太平公主朕之親

叔親姑同憂共戚楚客韋溫等又附會安樂公主妄欲翦  
除相王第三子臨淄郡王隆基家國情深君親義切乃與  
太平公主第二子薛崇簡及總監鍾紹京前同州朝邑縣  
尉劉幽求利仁府折衝麻嗣宗太平公主府典籤王師虔  
尚衣奉御王崇煜東明觀道士馮處澄寶昌寺僧普潤前  
商州司馬崔諤之山人劉承祖等僉符人望考以時宜叶  
契建謀重安李氏兵戈不動氛祲廓清瞬息之間還自屠  
滅朕以山陵未畢變故相仍情緒荒迷益深摧憤士庶等  
代承景化累荷國恩今得宗社乂安人祇交泰當同茲感

悅各效忠貞如更朋黨比周輒生異議朕當加嚴憲必所不容即宜宣示令知朕意

大赦詔

大盜移國朝有賊臣見危授命家多義士朕以凶閔觸諸糜潰姦豎搆扇傾陷宗社潛圖竊發機兆未萌相王第三子臨淄郡王隆基糾合同盟忠勇奮怒志除凶黨保護邦家逆賊韋溫馬秦客葉靜能宗楚客紀處訥武延秀趙履溫楊均等密行鴆毒先聖暴終朕志不圖全枕戈泣血風雲元感情計陰通太平公主男衛尉卿薛崇簡與前同州

朝邑縣尉劉幽求總監鍾紹京日夜共謀誓誅逆黨凶徒  
驚恧投竄無所今天衢交泰氛祲廓清宜申作解之恩以  
洽升平之化自唐隆元年六月二十一日昧爽已前大辟  
罪已下常赦所不免者咸赦除之其逆賊頭首咸已斬決  
自餘支黨一無所問內外官三品已上賜爵一等四品已  
下加一階隆基可封平王食實封一千戶賜物五千段薛  
崇簡封立節郡王食實封五百戶賜物三千段鍾紹京可  
銀青光祿大夫守中書侍郎潁川郡開國公食實封二百  
戶賜物一千段前同州朝邑縣尉劉幽求可朝議大夫守



中書舍人仍參知機務中山郡開國男食實封二百戶利  
仁府折衝麻嗣宗可雲麾將軍行左金吾衛中郎將賜物  
一千段追貶皇后韋氏爲庶人安樂公主爲悖逆庶人

讓位詔

自古帝王必有符命兄弟相及存諸典禮朕以孤藐遭家  
艱難顧茲蒙識未洽理途茫茫四海將何所屬累聖丕基  
若墜於地王室多難宜擇長君思與羣公推崇明聖叔父  
相王高宗之子昔以天下讓於先帝孝友寬簡彰信兆人  
神龍之初已有明旨將立太弟以爲副君爲王懇辭未行

冊命所以東宮虛位於今歷年徹綴在辰禍變倉卒後掖  
稱制計立冲人欽奉前懷願遵理命上申天聖之旨下遂  
蒼生之心俯稽圖緯之文仰跂祖宗之烈擇今日請叔父  
相王即皇帝位朕退守本藩歸於舊邸凡百卿士敬承朕  
言克贊我天人之休期以光我有唐之勲業布告遐邇咸  
使聞知

答相王讓位詔

皇極大寶天下至公王者臨之蓋非獲已王先聖舊意蒼  
生推仰龍光紫宸貴允係望請遵前旨勿或推讓

寧王憲

憲睿宗長子本名成器避昭成皇后尊號改焉初封永平郡王文明元年立爲皇太子及睿宗降爲皇嗣更冊授皇孫出閣開府置官屬長壽二年改封壽春郡王復詔入閣長安中累轉左贊善大夫加銀青光祿大夫中宗立改封蔡固辭唐隆元年進封宋睿宗踐祚拜左衛大將軍時帝將建儲以憲嫡長而元宗有大功意久不定憲涕泣固辭帝嘉其讓以爲雍州牧揚州大都督太子太師進尚書右僕射兼司徒改太子賓客以司徒兼蒲州刺史進司空拜

太尉開府儀同三司厯岐州刺史開元四年徙封寧又厯  
澤涇等刺史兼太常卿復爲太尉二十九年薨年六十三  
帝以憲實推天下有高世之行非大號不稱乃追謚讓皇  
帝

讓兼領太常卿表

臣聞選賢任職量能授官苟非其才坐貽厥咎臣本愚劣  
累忝榮任叨居禮樂之司實乖河海之任吹庭鐘鼓克諧  
謝於昔人踈署威儀爲政慚於往哲僂從事於茲六年  
詩稱素餐於是乎在伏惟開元神武皇帝陛下繼業昭暢

仁化清和乘暇奏薰風之琴追賞聚雲和之曲典章斯備  
雅量攸歸遠美咸英獨冠區宇臣幸膺國戚久亞台陛兼  
管寺卿實黷朝憲惡盈之戒列在前經過寵之談復開斯  
日願矜其庸昧授以良能人無異言官無曠位伏使晨趨  
北闕奉漢幄之龍顏夕赴西園飛魏庭之華蓋則臣之念  
畢矣聖主之恩深矣不任悚望翹勤之至謹詣朝堂奉表  
陳謝以聞

邠王守禮

守禮章懷太子次子始名光仁垂拱初改今名授太子洗

馬嗣爵雍王武后革命畏疾宗室守禮以父得罪與睿宗諸子閉處宮中十餘年聖厯元年睿宗自皇嗣封相王許出外郎守禮等始居外改司議郎中中宗立復故封拜光祿卿唐隆元年進封邠王睿宗立檢校左金吾衛大將軍出爲幽州刺史遥兼單于大都護遷司空開元初累爲州刺史皆擇僚首持綱紀惟弋獵酣樂未嘗領事後還京師二十九年薨年七十餘贈太尉

賀馴雉見齋宮表

臣謹按舊典雌來者霸雄來者王又聖誕酉年雞主於酉

斯蓋王道遐祚天命休禎請宣付史官以彰靈貺